

INUIT ATAQATIGIIT

INATSISARTUNI



5. januar 2011

Inatsisartut Suleriaasianni § 37, naapertorlugu matumuuna imaattunik Naalakkersuisunut apeqquteqarpunga:

Naalakkersuisunut apeqqut:

1. Ineqarneq pillugu Maalaaruteqartarfimmi Namminersorlutik Oqartussat kommunellu inissiaataanni attartortittakkani attartortut attartortitsisullu akornanni aaqqiagiinngissutit taamaallaat suliarineqarsinnaasernerat eqqorpa, taamaassimappallu eqqartuussivinni suliakkiisinnaanerup avataatigut qanoq attartortut inissiani namminersortunit pigineqartuni ineqarnermut akiliutip qaffasippallaarujussuarnera aammalu sakkortuallaamik atugassaritineqartut allat pillugit maalaaruteqarnissamut periarfissaqarpap?
2. Inissiani namminersortunit pigineqartuni attartortunut atugassaritineqartut Ineqarneq pillugu Maalaaruteqartarfimmit suliarineqarsinnaalernissaat Naalakkersuisut pitsaaqutissaqartippaat?
3. Taamaangippat - Naalakkersuisut inissiani namminersortunit pigineqartuni attartortut qanoq pitsaanerusumik illersorneqalernissaat takorloorpaat?
4. Nalunaarut ataani innersuunneqartoq malillugu imeqarnermut kiassarneqarnermullu aningaasartuutit uppersarneqarnerisa saniatigut, aningaasartuutit suut allat ineqarnermut akiliutip annertussusilerneqarneranut attartortitsisumit uppersarsaasernerqassappat?
5. Attartornermut isumaqatigiissutip atsiunnginnerani ineqarnermut akiliut aningaasartuutit malillugit eqqortumik naatsorsorneqarluni annertussusilerneqarsimanera pillugu, attartortoq pisinnaatitaaffeqarpa illup imaluunniit ineeqqap naatsorsuutai kukkunersiuisumit uppersarneqareersimasut takoqqaassallugit?
6. Taamaattoqanngippat - inissianik attartortitsisarneq pillugu peqqussutip allanngortinneqarneratigut imaluunniit nutaamik nalunaarutiliornikkut, attartortup taamatut pisinnaatitaaffeqalernissaa Naalakkersuisut periarfissaqarsoraat imaluunniit naleqquttuusoraat?
7. Apeqqutinut attuumassuteqarsinnaasunik allanik Naalakkersuisut paasissutissiisnaappat?

(Inatsisartunut ilaasortaq Olga P. Berthelsen, Inuit Ataqatigiit)

Tunngavulersuut:

Inissianik attartortitsisarneq pillugu Inatsisartut peqqussutaat nr. 2, 12. maj 2005-imeersoq, kingusinnerusukkullu allanngortinneqartartoq § 82, imm. 1-mi aalajangersarneqartut naapertorlugit Ineqarneq pillugu Maalaaruteqartarfimmi Namminersorlutik Oqartussat kommunellu inissiaataanni attartortittakkani attartortut attartortitsisullu akornanni aaqqiagiinngissutit taamaallaat suliarineqarsinnaasannuatsiarput.

Inissianik attartortitsisarneq pillugu Inatsisartut peqqussutaat nr. 2, 12. maj 2005-imeersoq, kingusinnerusukkut allanngortinneqartartumi §§ 33-35 aalajangersarneqarsimasut malillugit, inissiani attartortittakkani namminersortunit pigineqartuni ineqarnermut akiliutip annertussusilerneqarnissaa erseqqinnerusunik malittarisassiuunneqartussaapput. Taakku malillugit ineqarnermut akiliut aningaasartuutit malillugit annertussusilerneqartussaaneruvoq, aammalu arlalitsigut akiliut attartortitsisup aningaasaliissutininut aningaasartuutigisaanit uppersarneqartunit tunngaveqassasqo tikkuarneqarluni. Taamaattorli aalajangersakkap

nassuiaasersorneqarnerani erseqqinnerusumik najoqqutassiisoqanngilaq aningaasartuutit qanoq uppersarneqassanersut imaluunniit qanoq attartortumut takussutissiarineqassanersut. Imeqarnermut kiassarneqarnermullu aningaasartuutit uppersarneqassasut taamaallaat piumasarineqarpoq, Illuutitik najugaqarfissatut attartortitsisarneq pillugu Namminersornerullutik Oqartussat nalunaarutaat nr. 12, 23. april 2008-imeersoq, kapitali 8 naapertorlugu.

Kissaatigaara apeqqutigisakka ullut 10-it suliffiusut qaangiutsinnagit akineqareersimassasut. Kinguaattoortoqassagaluaripalli akissutigineqarumaartussat pitsaassusaannut malunniutissasut naatsorsuutigissallugu pissusissamisoorara. Qanorluunniilli pisoqassagaluarpat akissuteqaatit piffissaagallartillugu tigoreerusuppakka, taamaalillunga Inatsisartut 2011-imi ataatsminninnissaannut siunnersuutitik tunniussiffissaq qaangiutsinnagu aalajangiiffigisassatut siunnersuuteqaratarsinnaanera angumerisinnaaniassagakku. Inatsisartunut siunnersuutit tunniunneqareersimassapput 25. januar 2011.